

दिनांक 11.08.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- प्रधानमंत्री नरेन्द्र मोदी आज नुवी दिल्ली मांय बत्ती निपज, जलवायु मुजब अर जैव सशक्त फसलां री 109 किस्मां जारी करी।
- राज्य मांय हर घर तिरंगा अभियान रे तैत केई ठौड़ां निकाळी ज्यी तिरंगा यात्रा।
- प्रदेश मांय लारला चौबीस घंटां मांय न्यारी-न्यारी ठौड़ां तेज बिरखा रो दौर चाले-मौसम केन्द्र आवता चार-पांच दिन केई ठौड़ां भारी बिरखा री जतायी आस।
- पेरिस ओलिंपिक खेल-2024 रो आज रात शानदार जळसा रे साथै समापन।

000

प्रधानमंत्री नरेन्द्र मोदी आज नुवी दिल्ली रा भारतीय कृषि अनुसंधान संस्थान मांय चोखी पैदावार, जलवायु मुजब अर जैव ताकत वाळी फसलां री 109 किस्मा काड़ी है अ किस्मा 61 फसलां री है जिण मांय खेती 34 अर बागवानी री 27 फसलां है। खेती री फसलां मांय बाजरा, तिलहन, दलहन, गन्ना, कपास अर दूजी फसलां रा बीज भेळा है। बागवानी फसलां मांय फल, तरकारी, कंदमूल मसालां, फूल अर औषधीय पौधां रा बीज है। ई मौके प्रधानमंत्री काश्तकारां अर वैज्ञानिकां ऊं बतळ ई करी। प्रधानमंत्री कह्यो के नुई किस्मां मांय खेती मांय मौल बधेला। काश्तकारां कह्यो के नुवी किस्मा ऊं वां रा खर्चा मांय कमी आवेला अर पर्यावरण माथे सकारात्मक असर पडेला। श्री मोदी मोटा अनाज रो जिको कर्यो अर कह्यो के लोग पोषण खान-पान कानी बावड़ रिया है। वणा कह्यो के कृषि विज्ञान केंद्र री जाग जगावण मांय महताऊ भूमिकां है। पछे केन्द्रीय कृषि अर किसान कल्याण मंत्री शिवराज सिंह चौहान खबरनवीसा ऊं कह्यो के आज

काश्ताकरां सारू ऐतिहासिक दिन है जद 61 फसलां री 109 किस्मा काढी ज्यी है।

000

हर घर तिरंगा अभियान रे तैत प्रदेशभर मांय केई गतिविधियां व्हे री है। राजधानी जयपुर मांय आज मुख्यमंत्री जनसुणवाई दफ्तर ऊं तिरंगा यात्रा निकाळी ज्यी। कार्यक्रम मांय भेळा लोगां माथे ठौड़ ठौड़ फूल बरसायी ज्या। अभियान रे तैत जयपुर ग्रेटर नगर निगम कानी ऊं 13 अगस्त ने **तिरंगा मैराथन** रो आयोजन व्हेला। **भीलवाड़ा** जिला मांय केई ठौड़ां तिरंगा वाहन रैली निकाळी ज्यी। जिला मुख्यालय माथे पुलिस लाइन ऊं निकळी रैली री सरूआत जिला कलेक्टर अर पुलिस अधीक्षक करी। **चूरू** मांय वाहन तिरंगा रैली ने जिला कलेक्टर पुष्पा सत्यानी रवाना कर्या। रैली शहर रा खास मार्गा ऊं व्हेला इन्द्रमणि पार्क पूगी। **जैसलमेर** मांय ऐतिहासिक गड़ीसर सरोवर ऊं तिरंगा रैली निकाळी ज्यी। **केकडी** जिला मुख्यालय माथे निकाळी ज्यी तिरंगा वाहन रैली मांय घणी तादाद मांय नौजवान हिस्सो लियो। ई मौके जिला कलेक्टर नागरिकां ऊं 13 ऊं 15 अगस्त तांई हर घर तिरंगा फहरावण री अरज करी। **झालावाड** जिला मांय न्यारी-न्यारी ठौड़ां तिरंगा रैली निकाळी ज्यी।

बीकानेर मांय केन्द्रीय मंत्री अर्जुनराम मेघवाल हर घर तिरंगा अभियान ने ले र कह्यो के इण ऊं आखा देश मांय उमाव रो वातावरण है।

000

मुख्यमंत्री भजनलाल शर्मा कह्यो है के भारत प्राचीन काल ऊं ई केई पारंपरिक अर वैकल्पिक चिकित्सा पद्धतियां रो केन्द्र रह्यो है। आं चिकित्सां सिद्धांता री मार्फत '**यूनिवर्सल हेल्थ कवरेज**' रा लगस ने हासिल करण मांय मदद मिल री है। वणा कह्यो के आ सिद्धांता मांय इलेक्ट्रोपैथी री खास महता है अर राज्य सरकार इण ने बधावो देवण सारू वचनबद्ध है। ध्यानजोग है कि श्री शर्मा आज मुख्यमंत्री रहवास माथे इलेक्ट्रोपैथी चिकित्सकां री आभार अर अभिनंदन सभा मांय बोल रह्या हा। वणा कह्यो के राज्य सरकार आप रा पैला बजट मांय ई पारंपरिक चिकित्सा पद्धति इलेक्ट्रोपैथी ने बधावो देवण सारू

इलेक्ट्रोपैथी बोर्ड बणावण अर इण रा पैला चरण मांय पांच करोड़ रूप्यां रा बजट रो प्रावधान करी ज्यो है। वठे ई मुख्यमंत्री रहवास माथे भीलवाडा नगर परिषद ने नगर निगम मांय कमोन्नत करण समेत भीलवाडा अर जहाजपुर हलका रा बारा मांय बजट ऐलाणा सारू व्ही आभार सभा मांय बोलता मुख्यमंत्री ने कह्यो के राज्य सरकार समाज रा सगळा तबका री आशावा मुजब विकसित राजस्थान रा संकल्प रे साथै काम कर री है। वणा कह्यो के परिवर्तित राज्य बजट 2024–25 मांय हर हलका अर हर तबका ने सौगाता दीरीजी है।

000

प्रदेश मांय आ दिनां **हरियाळो राजस्थान अभियान** रे तैत न्यारी न्यारी ठौड़ां पौधरोपण कर्यो जावे। झुन्झुनू रा बगड़ मांय **एक पेड़ मां के नाम अभियान** रे तैत नगरीय विकास मंत्री झाबर सिंह खर्चा पौधा रोपण कर्यो। श्री खर्चा कह्यो के देश रा 140 करोड़ लोगां ऊं प्रधानमंत्री नरेन्द्र मोदी एक पौधो आप री माँ रे नाम लगावण री अरज करी है। वणा कह्यो के ई अभियान ऊं आवण वाळां पांच सालां मांय पर्यावरण संरक्षण अर सवर्धन मांय बढवार व्हेला।

000

प्रदेश मांय मॉनसूनी बिरखा रो दौर बरोबर चाल रह्यो है। खासकर ने अगूणी राजस्थान मांय न्यारी-न्यारी ठौड़ां लारला 24 घंटां मांय भारी बिरखा दर्ज करी ज्यी है। मौसम केन्द्र जयपुर मुजब बीत्यां 24 घंटां मांय सब ऊं बत्ती 38 सेंटीमीटर बिरखा करौली मांय दर्ज करी ज्यी। टोंक मांय 14, बारां रा शाहबाद मांय 12, दौसा रा सिकराय मांय 11 सेंटीमीटर बिरखा दर्ज व्ही है। करौली जिला मांय व्हे री बिरखा ऊं निचला हलकां मांय पाणी भरीज ग्यो है। भारी बिरखा ने देखता जिला रा सगळा सरकारी अर गैर सरकारी स्कूलां मांय काले छुट्टी ऐलाण करी है। वठे ई बचाव रा कामा सारू एस.डी.आर.एफ. री टीम तैनात करी ज्यी है और ब्यौरो म्हाणा खबरनवीस ऊं—

.....

सवाईमाधोपुर मांय काले रात ऊं सरू व्ह्यो बिरखा रा दौर आज ई रूक-रूक ने चालतो रह्यो। शहर रा केई हलकां मांय सड़का माथे पाणी भरीज ग्यो है। बिरखा रे कारण रणथम्भौर दुर्ग मार्ग रूकीज ग्यो

है वठे ई भरतपुर संभाग मांय तेज बिरखा रो दौर चाल रह्यो है। अठिने राजधानी जैपर मांय आज संवारां ऊं ई बिरखा रा दौर बण्योड़ो है। तेज बिरखा रे कारण सड़कां अर निचला हलकां मांय पाणी भरीजण ऊं आम जिन्दगी माथे असर व्ह्यो है। चूरु ज़िला मांय लारला दो दिनां ऊं व्ही चोखी बिरखा ऊं काशतकारां मांय खुशी रो माहौल है। काशतकारां रो माननो है के आ बिरखा फसलां सारु घणी फायदामंद है। सिरोही जिला मांय माउंट आबू समेत केई ठौड़ां रूक-रूक ने बिरखा रो दौर चालतो रह्यो। उत्तराध अगूणी राजस्थान अर आरे-सारे रा हलकां रे ऊपर आज ई एक परिसंचरण तंत्र बण्योड़ो है। मौसम केन्द्र जयपुर रा निदेशक राधेश्याम शर्मा बतायो के ई रा असर ऊं आवता 5-6 दिन मॉनसून सक्रिय रहवण अर कठे-कठे ई भारी अर कठे-कठे ई घणी भारी बिरखा रो दौर चालता रहवण री आस है।

000

प्रदेश मांय न्यारा-न्यारा हादसां मांय 9 लोगा री मौत व्हे ग्यी अर तीन लोग घायल व्हे ग्यां भरतपुर ज़िला रा बयाना हलकां मांय बाणगंगा नदी मांय नहावण गया सात मिनखा री डूबण ऊं मौत व्हे ग्यी। दूजा हादसां मांय भीलवाड़ा ज़िला रा **जोगणिया माता घाटा** मांय मिंदर जा रह्या सिरधालुआं री कार पलट जावण ऊं एक सिरधालू री मौत व्हे ग्यी अर तीन दूजा घायल व्हे ग्या। उठिने बांसवाडा रा कडेलिया झरना मांय नावती बगत डूब जावण ऊं एक मिनख री मौत व्हे ग्यी।

000

कोई तीन हफता तांई चाल्या, रोमाचंक खेल होड़ां रे पछे आज रात पेरिस ओलिम्पिक खेल पूरा व्हे रह्या है। समापन जळसो भारत रा बगत मुजब रात साढे 12 बज्या सरु व्हेला। ई दौरान 80 हजार दर्शकां रे स्टेडियम मांय मौजूद रहवण री आस है। मनु भाकर कांसी रो तमगो जीत ने ई ओलिम्पिक मांय भारत ने पैलो तमगो दिला र इतिहास रच्यो। वे ओलिम्पिक निशानेबाजी मांय तमगो जीतण वाळी

पैली महिला है। वणा सरबजोत सिंह रे साथे 10 मीटर री **मिक्सड टीम एयर पिस्टल** होड़ मांय एक और कांसी रे तमगो जीत ने एक ई ओलिम्पिक मांय दो तमगा जीतण वाळी महिला होवण रो नुवो रिकॉर्ड आप रे नाम कर्यो। स्वप्निल कुसाले निशानेबाजी मांय तीसरो तमगो जीत्यो। हॉकी मांय भारत री पुरुष टीम कासी रो तमगो आप रे नाम कर्यो। नीरज चोपड़ा पुरुषां रा भाला फेंक मांय चांदी रो तमगो जीत्यो। भारत रा उभरता पहलवान अमन सहरावत 57 किलोग्राम फ्री स्टाइल होड़ मांय कांसी रो तमगो जीत ने ओलिम्पिक मांय तमगा जीतण वाळा भारत रा सब ऊं कम उम्र रा खिलाड़ी बण्या। ई ओलिम्पिक मांय भारत एक चांदी अर पांच कांसी रा तमगा जीत ने 71वीं ठौड़ हासिल करी है।

000

प्रधानमंत्री नरेन्द्र मोदी राष्ट्रपति द्रौपदी मुर्मू ने तिमोर लेस्ते रा ठांवां नागरिक सनमान **“ग्रैंड कॉलर ऑफ़ ऑर्डर ऑफ़ तिमोर-लेस्ते”** ऊं सनमानित कर्या जावण माथे मान जतायो है। एक सोशल मीडिया पोस्ट मांय प्रधानमंत्री कह्यो के देश सारू ओ गौरव रो क्षण है के भारत री राष्ट्रपति ने तिमोर लेस्ते रो ठांवो नागरिक सनमान नवाजी ज्यो है। श्री मोदी कह्यो के ओ नामी सनमान भारत अर तिमोर लेस्ते रा मजबूत संबंधां अर आपसी सनमान रो प्रतीक है।

000